



行素州堂金石叢書

103012
6104
899
部 = 庫





金石錄補卷第七

跋尾

槐廬叢書

崑山葉奕包九來著

吳縣朱記榮校訂

蜀漢關氏祖宅塋下磚刻

蜀漢張飛八濛山題名

蜀漢張飛刁斗銘

魏太祖湧月臺三大字

魏下豫州刺史修老子廟詔

魏大嚮記殘碑

魏三體石經遺字

魏甄皇后識坐板函

吳周瑜散花巖刻石

吳谷朗碑

晉黃庭經

晉王羲之十七帖

晉王羲之快雪帖

晉索靖急就章

晉楊義和黃庭經

晉顧愷之女史箴

宋文帝神道碑

宋散騎常侍謝公墓銘

宋臨澧侯劉使君墓銘

宋臨澧侯劉使君碑陰

梁永陽太妃王氏墓誌銘

梁孝敬寺刹下銘

梁上清真人壇碑

蜀漢關氏祖宅塋下磚刻

右磚刻在解州錢唐林璐記曰康熙戊午昌平于昌讀

書解州塋廟塋廟者里人傳為侯之故居也濬井得巨

磚有文紀兩世生卒年月字諱昌白于州守王君朱旦

乃自為碑其文云祖諱審字問之漢和帝永元二年庚

寅生居解州常平鄉寶池里桓帝永壽三年丁酉卒父

諱毅字道遠桓帝延熹三年庚子六月二十四日產侯

于故里娶胡氏靈帝光和元年戊午五月十三日生子

平璐又曰其大略如此獨怪王君既爲碑而輒刻全文不錄璐字鹿庵吾友陸繁昭之戚也知予集古碑以此記見寄竊嘆侯忠義貫日月肝蠻徧彘夏而本傳不載祖父名俗又誤以五月十三爲侯生日雖未見碑刻然發于井碑于王記于林而錄于予千古幸事亦快事也錢虞山尙書重編義勇武安王集年譜考不載侯之生平但引吳泳鶴林集云張飛卒年五十謂侯傳云長于益德數歲數歲云者不及十年不過六七年五六年耳按飛于章武二年被害爲壬寅上溯五十年當生于孝靈之熹平二年癸丑去侯生孝桓之延熹庚子蓋長十有三年其云數年乃史官約略之詞耳明嘉靖中解州知州徐作所撰修廟記云州東二十里常平下馮村爲王故里父老云王舊居有塏塏下有井王避難出亡父母沈葬于內後人立塏表之則前所云濬井得磚刻必葬時之物第荆楚又相傳侯以六月二十二日生子平生于五月十三日似向來有是說而于昌輩傳會之未可知也

蜀漢張飛八濛山題名

右題名在四川渠縣東七里八濛山崖石上題云漢將軍飛率精卒萬人太破賊首張郃于八濛立馬勒銘凡二十二字是時飛領巴西太守曹操破張魯畱夏侯淵張郃守漢川郃別督諸軍下巴西進軍宕渠蒙頭盪石

與飛相拒五十餘日飛從閒道要郃破之郃以數騎奔南鄭巴西始安先主入蜀得鼎峙數十年皆于此戰破魏人之膽其功爲第一飛善畫工八分此雖片羽一鱗百世而下猶得想見其擐甲倚馬虎氣騰上時也

蜀漢張飛刁斗銘

右張飛刁斗銘八分書在涪陵之石壁張士環詩云天下英雄只豫州阿瞞不共戴天仇山河割據三分國宇宙威名丈八矛江上祠堂儼佩劍人間刁斗見銀鉤空餘諸葛秦州表左袒何人復爲劉楊用修云張飛刁斗其銘文字甚工飛所書也

魏太祖湧月臺碑

右湧月臺碑正書在武昌黃鶴樓側三字傍題操字陳確庵游楚中揚以見惠初展卷凜凜有生氣可想其運腕時無限鋒鋌也相傳朱考亭學操書所謂不以人廢言者耶

魏下豫州刺史修老子廟詔

右詔云告豫州刺史云黃初三年十月十五日口子下與漢詔式同此碑凡十三行行八字磨滅大半前有魯爲孔子立廟援先聖以爲比也稱桓帝者再蓋東漢惟威宗尊祀老子故此詔申言之洪氏云紀年月日之下闕子上一字按四分歷是年十月壬戌朔則十五日當爲丙子也

魏大嚮記殘碑

右碑額云大嚮記乃古文非篆隸也黃初三年口月闕
闕文爲書按魏文帝大嚮六軍立碑于譙在是年之
前二載此碑饗作嚮假借也受禪諸碑爲鍾繇書而紀
年下一字左從留而闕其右疑是繇書而當時亦謂之
鍾繇殘碑

魏三體石經左傳遺字

右魏三體石經左傳遺字古文二百七篆文二百十七
隸書二百九十五有一字而三體不具者洪氏曰洛陽
蘇望有言曰後漢熹平四年靈帝以經籍文字穿鑿疑
誤後學詔諸儒讐定五經命蔡邕書古文篆隸三體鐫

石立于太學今石不存本亦罕見近于故相王文康家
得左氏傳搨本數紙其石斷裂字多亡缺取其完者摹
刻之凡八百一十九題曰石經遺字卽小歐陽集古日
中所有者夏文莊公集古文四聲韻所載石經數十字
蓋有此碑所無而碑中古文亦有韻所未收者淪落之
餘兩家所得自不同耳

魏甄皇后坐板函

右函文云文昭皇后識坐板函洪氏云紹聖丙子鄴民
耕地得一綠石匣廣八寸有半長倍之厚三分之一鹿
頂笏頭其上有此八字神坐前之物也按魏書黃初二
年葬甄夫人于鄴明帝卽位追上尊諡別立寢廟此云

文昭皇后則刻于太和元年也

吳周瑜散華巖刻石

右周瑜題字八分書楚人顧景星語余云散華巖大于虎邱之石場其平如砥字五尺餘勒于平巖相傳爲周公瑾赤壁之戰散花犒軍士于此手書以識之也夫古人大書深刻其意將垂不朽而漠然徒見山高水清又未嘗不笑古人之愚也東坡云曹瞞之困于周郎而今安在哉集古錄有唐虬怡亭銘在武昌江中小島上武昌人謂其地爲吳王散花灘未知卽此巖否

吳谷朗碑

右谷朗碑云府君諱朗字義先其先出自顓頊益虞舜賜姓嬴氏後封秦谷因氏焉弱冠守揚安長升王府郎中尙書令史郡中正遷劉陽令徵拜立忠都尉尙書朗正身率下不畏疆禦交州叛帝思俾父僉以君往遷九真太守春秋五十四于鳳凰元年卒按吳志建衡三年陶潢破交趾禽殺晉所置守將九真曰南皆還屬朗必以是年守九真明年改元鳳凰而卒碑云凡百君子莫不嗟痛又云濟濟搢紳靡瞻靡宗則朗必爲朝野所推重而史不立傳其三世皆仕吳爲牧守而志亦無考矣

晉黃庭經

右小楷黃庭經相傳爲逸少書而黃伯思證其誤然陶隱居啓梁武帝云逸少有名之迹不過數首黃庭告誓

金石錄卷第七
等不審猶有存否唐張懷瓘云樂毅黃庭但得幾篇卽
爲國寶至李太白詩山陰道士如相見應寫黃庭換白
鶯梁虞和論書表云山陰道士語逸少若能自屈書道
德經兩章便合羣鶯以奉卽羲之本傳亦云爲道士寫
道德經而非黃庭按羲之卒于晉穆帝升平五年後二
年爲哀帝興寧二年黃庭始降于世則非王書可知

晉王羲之十七帖

右王逸少草書以卷首有十七日云云故名凡百七行
九百四十三字王草書烜赫著名帖也唐文皇購二王
書逸少草有二千紙率以一丈二尺爲卷以貞觀兩字
印印之開元皇帝又以開元兩字印印之跋尾列當時

大臣姓名黃長睿云世間有二本其一卷尾有勅字及
褚遂良校定者爲先唐刻本其一爲本朝侍書王著模
勒上石勢殊疎拙按張彥遠法書要錄論此帖本末更
詳云

晉王羲之快雪帖

右快雪時晴帖王右軍真蹟藏涿州馮銓閣老家勒石
在近時亦王書之神品

晉索靖急就章

右急就章章草也篆隸之作古矣至漢章帝時乃變而
爲草或曰秦苦篆隸之難不能投速故作草書書譜云
杜度倡之于漢謂之章草黃伯思云凡草書分波磔者

名章草此帖藏宣和御府元宋仲溫摹勒尤爲精妙與月儀帖並著于世

晉楊義和黃庭經

右黃素黃庭經行楷數千字神采煥發結構精警董文敏據趙承旨以爲飄飄有仙氣乃楊許舊蹟述書賦云方圓自我結構遺名如虛舟之不繫混寵辱以若驚謂義和爲書家所重元時真蹟在鮮于伯機家文敏從韓宗伯摹數行刻戲鴻堂帖中陳氏玉烟堂則全刻之義和名義卽真誥所謂上清真人也神仙之蹟不可多得唐時有帶書六行此經多至數千字非異物耶

晉顧愷之女史箴

右女史箴後題顧愷之畫下作押字雲間董宗伯跋云風神俊朗欲與感甄賦抗衡自余始爲拈出快事也寶鼎齋自跋所書又云昔年見晉人畫女史箴云是虎頭筆分類題箴附于畫左方則大令書也此箴後有愷之畫字似與後跋相合但大令書女史箴自唐宋以來不聞所據而是箴亦不類大令則仍宗伯原題而已

宋文帝神道碑

右碑云太祖文皇帝之神道凡八大字集古錄云古人刻碑正當如此又云自漢以來碑文務載世德宋氏子孫未必能超然獨見復古簡質疑非宋世所立按文帝爲元克劭所弑初諡曰景廟號中宗孝武立改諡曰文

號太祖或更有碑此其神道如漢人墓闕題識也

宋故散騎常侍謝公墓誌

右碑無序文銘辭亦無建碑年月書撰姓名共八行前
四行誌祖父母及母之所自出中則誌其爵里名字卒
葬年後兩行誌其夫人與夫人之父祖末則誌其嗣孫
而已謝公祖父皆顯官身為常侍雖宋書無考豈得無
銘序以紀其生平或如宋劉襲有二碑或如唐郭子儀
官爵錄于家廟碑陰也祖瑤字球度夫人琅玕王氏父
頤之考闕字景山給事侍郎常侍光祿勳夫人太原王
氏父坦之字文度持節都督平北將軍闕刺史藍田獻
侯按坦之為桓温長史温欲為子求婚于坦之還家省

父述述愛坦之雖長大猶抱寘膝上坦之因言温意述
大怒遽排下曰汝竟癡耶坦之辭温以他故今適謝者
豈即此女耶坦之薨贈安北將軍與碑平字異中行云
宋故散騎常侍揚州丹陽郡秣陵縣西鄉顯安里領豫
州陳闕陽夏縣都鄉吉遷里謝濤字明遠春秋卅有九
元嘉十八年歲次屠維月依林鐘十七日卒其年九月
卅日窆窆于揚州丹陽郡建康縣東鄉土山里按申伯
封于謝後以國為氏即今汝南謝城也過江門第謝次
于王世相婚姻于此碑見之古人入籍則書如秣陵西
鄉為濤所居之里而陽夏縣都鄉則祖父之原籍也陳
字下缺者必郡字如謝尚謝安輩皆陳郡陽夏人濤必

其族也又汝南郡汝南縣有郡鄉吉遷里見陶宏景冥
通記夫人琅琊王氏七十有二大明七年歲次單閏月
下闕十五日卒十一月十四日合祔父靜之字下闕義
興太守祖獻之字子敬中書令蓋獻之無子以兄之子
靜之爲嗣也碑末云嗣曾孫綽愚意志墓者應如此式
其人果有卓行宏勲國史邑乘當自立傳何必假諛墓
之文以欺後世今則子孫富貴輒干達官名人爲祖父
作誌率多譽詞跖柳混淆蔡中郎于郭有道碑自信爲
無媿良有以矣子前跋唐景昭法師碑辨宋板晉書丹
陽郡陽字從阜丹楊縣楊字從木按山多赤柳故名丹
楊則郡與縣楊字皆宜從木閱此碑信然

宋臨澧侯劉使君墓誌銘

右碑題云宋故散騎常侍護軍將軍臨澧侯劉使君墓
誌銘并序無書撰人姓名序云君諱龔字茂德南彭城
人宋高祖武皇帝弟景王之穆秘書郎太子舍人出爲
鎮蠻護軍廬江太守遷明威將軍安成太守皇朝築除
輔國將軍郢州刺史封建陵縣侯俄徵太子右衛率加
給事中未拜遷侍中冠軍將軍改封臨澧縣侯遷右衛
將軍未拜仍除中護軍春秋卅有八以泰始六年三月
十日薨于位詔贈護軍將軍加散騎常侍侍中如故諡
忠侯五月二十七日塋于琅邪乘武岡按史所歷之職
視碑甚略封建陵侯時食邑五百戶以建陵屬蒼梧郡

道遠改封乃碑之所遺碑云中流構豐四表迷逆君能以一成之旅剋濟忠節不若史臣直序晉安王子勛爲逆襲據城拒之子勛攻圍不下之爲明暢也史云襲亦庸鄙在郢州暑月露禪上聽事綱紀正伏閣怪之訪問乃知而碑則云神姿韶雅英議獨發兼錄詔文有志行貞純才用理濟之褒夫諛墓者或多飾詞豈王言亦可失實耶抑或史臣毛舉細故而加以庸鄙也歟

宋臨澧侯劉使君碑陰

劉襲有二誌碑題與前同但無銘序二字所誌者其祖父昆弟姊妹與夫人子女也如云曾祖宋孝皇帝卽劉裕父孝穆皇考也祖諱道鄰字道鄰侍中太傅長沙景

王史遺其字妃高平平陽檀氏字憲子諡景定妃父暢道淵祖貌稚熊合墓琅邪臨圻莫府山父諱義融字義融領軍車騎桂陽恭侯夫人琅琊臨圻王氏字韶風父簡長仁祖穆伯遠合墓丹徒練壁雩山所生母湯氏宣城人墓雩山兄顓茂道桂陽孝侯夫人廬江瀟何氏憲英父愉之彥和祖口叔度合墓練壁雩山第三弟彪茂蔚祕書郎墓江_{關三}夫人河南陽翟褚氏成班父方回祖叔度第四弟_{關三}軋史云名實太子舍人夫人琅琊臨沂王氏淑婉父津景源祖虞休仲_{關二}江乘白山第五弟季茂通史名爽海陵太守墓練壁雩山夫人陳郡陽夏_關氏妙_關父淑陽源太尉忠憲公祖豹士蔚按史

袁淑諡忠憲夫人乃淑之女也第一姉茂徽適陳郡長平殷臧憲卽父元素祖曠思泰重嫡琅玕臨沂王閔之希損父昇之休道祖敬宏第二姉茂華嫡廬江濤何求子有父鎮長宏祖口之彥德第三姉茂姬嫡平昌安邱孟詡元亮父離靈口祖昶彥遠第四姉茂姜嫡蘭陵蕭蕭惠徽父思話祖源之君流第五姉茂容嫡蘭陵蕭瞻叔文父斌伯蒨祖暮之仲緒重嫡濟陽圍蔡康之景仁父熙元明祖廓子度第六姉茂娘嫡濟陽孝城江遜孝言父湛徽淵祖夷茂遠重嫡琅玕臨沂王法興父翼之季弼祖楨之公幹夫人濟陽考城汪氏景媾父淳徽源祖夷茂遠此龔之夫人也第一男口長暉出後兄桂陽侯

口史云晃第二男旻淵高臨禮世子第三男昂淵華第四男量淵遂出後弟實爲史所遺第五男口淵頰第六男晏淵平第一女麗昭第二女麗明第三女小字僧歸前碑云武皇帝弟景王之穆而此上承曾祖以下得互見體自兄顓以下及其配配之父祖與葬處自姉以下及其夫夫之父祖茂徽姊妹所適皆大族而夫亡再適何也豈晉宋之際兵戈擾攘名節在所略也耶予見碑誌甚多凡序列族黨未有如是之詳者與史或有證發故盡錄之以傳于世然碑中他姓祖父皆具爵位已不及錄矣

梁永陽太妃王氏墓誌銘

右碑題故永陽敬太妃墓誌銘尙書右僕射太子詹事
臣勉奉敕撰碑云永陽國太妃王氏琅琊臨沂人以天
監二年六月十日遣宗室蕭敬寶築命永陽王母王氏
爲國太妃以普通元年十一月九日薨詔給東園秘器
其月二十八日祔瘞于琅琊臨沂縣長千里黃鵠山又
詔賜嘉謚云口按史天監元年追封兄齊後軍諮議敷
爲永陽王謚曰昭王氏爲敷之妃敷子伯游子二年四
月薨封爲永陽郡王年二十三薨謚曰恭大妃薨時年
五十有九早爲孤孀老爲嫠母梁武加恩宗戚視諸朝
爲獨厚矣凡碑題先書國號而此不書豈緣帝族不問
而知爲梁也耶卽奉敕撰文者亦不書姓徐勉傳先爲
太子詹事尋遷尙書右僕射亦猶今日書現居之職于
前也耶

梁孝敬寺刹下銘

右銘題云孝敬寺刹下銘并序宗士標述序云孝敬寺
者公上璉爲母楊叔女之所立又云寺初欲監刹曇
誕每有雙舍利降之并諸處所送其數有八大同六年
五月十五日建序銘皆能手又有誌敘公上璉捨宅建
寺監刹祝禱之辭說文云刹柱也音與察同王中頭陀
寺碑列刹相望李周翰注列刹佛塏也虞愿傳以孝武
莊嚴刹七層帝欲起十層不可立分爲兩刹各五層梁
簡文同泰寺立刹啓寶塏天飛魏書釋老志慕建宮宇

謂爲塏塏亦胡言猶宗廟也故世稱塏廟或稱寺曰上
刹則刹不止如柱然北齊陸法和攻侯景將任約約逃
不知所之法和曰吾前于此洲水乾時建一刹實是賊
標今何不向標下求賊果于水中見約抱刹仰頭而禽
之亦猶今之旛竿也此碑題刹下二字殊新

梁上清真人壇碑

右碑云上清真人許長史壇貞白先生創立篆書十四
字按陶隱居真靈位業圖第二位內左卿仙侯真君許
君注諱穆南嶽天人弟子事晉爲護軍長史退居句曲
山此碑應爲後人所立而追署真白先生也

金石錄補卷第七

金石錄補卷第八

跋尾

槐廬叢書

崑山葉奕包九來著

吳縣朱記榮校訂

後魏賈思伯碑

後魏周惠達碑

後魏神龜造像碑記

東魏比丘尼法妃等造像記

東魏永樂十六角題名

北齊風峪石刻佛經

北齊造銀佛像記

後魏賈思伯碑

右賈思伯碑云諱思伯字士休武威姑臧人也太和中

召拜滎陽太守辭不獲又云青龍中出爲幽州刺史齊郡太守其前後已磨滅不可盡識按趙氏錄賈思同碑跋云思同與其兄思伯後魏書皆有傳爲青州益都人今其基乃在壽光縣而思伯之碑亡矣此碑官秩與傳合青龍年號則三國之魏非拓拔氏也前魏有賈詡爲姑臧人豈卽思伯之高曾列在此碑以殘泐而無考耶德父云碑已亡而尙存于數百年後又一奇也但勸進受禪大饗諸碑皆作漢隸此碑忽開隸楷之漸直似褚河南三龕記筆意乃正書之始歟

後魏周惠達碑

右周惠達碑額云大魏故司空匡穆周公之碑銘篆書

十二字宛然如新按碑多與史傳合碑具贈諡而史逸之史但云開皇初追贈蕭國公耳此碑與豆盧恩碑皆在咸陽縣爲縣令王公家瑞求得之王公有金石遺文載此碑止缺三十三字

後魏神龜造像碑記

右碑魏神龜三年立集古錄云魏孝明神龜三年七月辛卯改元正光而此碑立于是月之十五日未知辛卯是其月何日也予考北史正光元年春正月己亥朔日有蝕之推至七月去小建或二日三日則辛卯當在十九二十之間立碑前于改元三四日故猶稱神龜也

東魏比丘尼法妃等造佛像記

右記大魏武定造像碑篆額中云大魏武帝五年十一月廿三日比丘尼法妃法翁法姜等敬造釋迦石像一菩薩二天龍寶璫八部上爲皇帝中宮云云當時造像碑記率因是語猶今叢林主僧上堂說法開口卽云上祝皇帝萬歲其詞俚鄙其意浮僞古今習俗然也書極楷而小得黃庭樂毅遺意殊可愛玩郡人葛君常所藏後魏永樂十六角題名

右題名爲東魏北齊人所書其後云造十六角鎮國大浮圖蓋增也集古云十六角與常三義七級碑當時俚俗語類皆如此

北齊風峪石刻佛經

右石刻在太原縣之西五里其山曰風峪朱彝尊曰風峪之口風穴存焉相傳神至則穴中肅然有聲風之所從出也愚者捧土塞穴建石佛于內環列所刻佛經凡石柱一百二十有六積歲旣久虺蝎居之雖好游者勿敢入焉丙午三月予至其地率土人燎薪以入審視書法非近代所及徘徊久之惜皆掩其三面未獲縱觀其全也又曰通鑑載後唐劉后與李存渥奔晉陽李彥超不納存渥走至風谷爲其下所殺注云風谷恐當作嵐谷唐長安三年分宜芳縣置嵐谷縣屬嵐州非也風谷卽風峪北人讀谷爲裕俗加山作峪按北齊書段韶傳突厥從北結陣而前東拒汾河西被風谷大唐創業起

居注煬帝于樓煩置宮因過太原取龍山風谷道行幸則風谷之名已著于前代矣

北齊造銀佛像碑

右碑云天保四年六月二十五日佛弟子李買造銀象一區上爲皇帝陛下下爲亡父母姻緣眷屬善願從心所求如意象卽像區卽軀文旣簡略書復醜惡以一佛像而上爲天子下接父母眷屬殆諂佞之至而忘尊卑之分者耶

光緒歲在丁亥仲春之月吳縣朱記榮槐廬家塾重刊金石錄補卷第八

金石錄補卷第九

跋尾

槐廬叢書

崑山葉奕包九來著

吳縣朱記榮校訂

北齊摩巖報德碑

北齊龍華寺造浮圖碑

北齊常山義七級碑

後周豆盧恩碑

北齊造石像記

北齊曇始禪師行狀記

北齊婁公造無量壽佛像碑陰

北齊造石像記

隋曇詢禪師碑

隋伏波將軍陳府君墓誌序

隋勝福寺舍利塔銘

隋羅處士墓誌

隋李淵為子祈疾疏

隋榮澤令常醜奴誌

隋梁羅墓誌

隋鉗耳君清德頌

隋緣果道場碑

隋李靖上西嶽書

北齊摩巖報德碑

右碑燕州仙釋書序云鄉郡鄉縣李青為儀同文靜公

趙郡李憲闕下司空文簡公李希宗二公父子以禮待青

于天保六年七月一日百州路側造報德像碑摩巖刻

石又云皇后趙國栢仁縣永寧鄉陰灌里人也祖文靜

父文簡按北史文宣皇后李氏諱祖娥趙郡李希宗女

而遺其鄉縣王父之名碑在今平定州

北齊龍華寺造浮圖碑

右碑不著書撰姓名序云維邨劉顯等于雙井邨造龍

華浮圖一區爵離一區爵離者寺之別名北朝習俗語

也

北齊常山義七級碑

右碑不著書撰人名氏題云慕容儀同麴常山石氏諸

邑義七級之碑其文云常山太守六州大都督儀同三司綦連公以天保九年爲國敬造七級浮圖一區天統二年使持節都督瓜州諸軍事驃騎大將軍儀同三司瓜州刺史常山太守六州大都督頻陽縣開國子樂平縣開國男慕容樂散騎常侍驃騎大將軍前給事黃門侍郎繕州大中正食新市縣幹麴顯貴功曹石子和等增成之集古錄云北齊書有綦連猛不爲常山太守不知此公爲何人而慕容樂官兼刺史兼封兩縣不可詳也食縣幹入官銜當時之制亦不可詳也按高齊大臣率爲六州都督綦連猛傳云天保九年轉武衛大將軍造塔時或在未轉之先旣自外轉內史館畧太守而不

書耶官氏志其連氏改爲綦氏此綦連而非其魏書亦未有姓其連與綦者慕容儼傳後附樂官次甚畧當以碑爲正北齊官制一品至九品皆以帛爲秩其祿一分以帛一分以粟一分以錢而又各給事力一品主三十人下流外勲品遞降詔州刺史守令以下幹及勿皆聽勅乃給其幹出于所部之人一幹輸絹十八疋本州大中正率以京官爲之凡食郡幹縣幹或兩郡三郡至五六縣者積幹力而計多少也赫連子悅爲林慮長世宗問所不便于悅對云臨水武安二縣去郡最遠若東屬魏郡則地平路近世宗笑曰卿徒知便民不覺損幹子悅云不敢以私潤負公心卽此幹也自宋以後有僮幹

之制齊永明五年詔二品清官笞幹不得過十張融坐
鞭幹錢敬道免官梁王葺坐鞭幹曹申免官豈以徵幹
過酷而嚴其罰耶或力役之幹而非輸絹之幹未之詳
矣

後周豆盧恩碑

右碑八分書在咸陽縣碑云恩字永思按北史豆盧寧
傳弟永思而闕其名歷官與碑畧同但碑後截漫滅不
可考矣

北齊造石像記

右碑齊武平元年正月二十六日造佛象作記而不言
其地以頌都邑主董洪達率邑徒口人等祈福云云其
署名則有都維那忠正勸化主北面像主都開光明主
褒主邑子之稱姓氏則有馬黃頭張黃頭張虎子石伏
奴之名都維那似係僧官而著姓總之淪于北方種族
不類名號俚俗如傅豎眼姚黃眉皆列正史黎庶效尤
不足怪也書灑怪誕幾不成字增損任意在篆隸正書
之外无作天器作奇之類世卽卅字碑在嵩山登封令
長洲張幢牖如所惠也

北齊曇始禪師行狀記

右碑武平元年追述曇始禪師行狀云太原之西約一
舍地有山曰虎狼谷乃始棲息之所卽于其處立碑按
神僧傳曇始關中人晉孝武太元間賫經律數十部往

遼東宣化義熙初還關中後燕拓跋燾克長安有博陵
崔浩少習左道破釋教與天師寇氏說燾廢之以太平
七年毀滅佛法統內僧尼追捕梟斬師以元會之日杖
錫見燾燾令依軍法屢斬不傷餒餉北園所養之虎虎
輒潛伏試以天師虎卽鳴吼燾乃延始上殿始爲說法
皆與碑合而傳又云始足白于面雖跣涉泥水未嘗沾
濕天下稱白足和尚長安人王胡有叔死數年忽還將
胡遍遊地獄叔謂胡曰旣知因果但當奉事白足阿練
胡徧訪衆僧見始白足事之赫連勃勃破關中斬戮無
數始亦遇害而刃不能傷勃勃嗟嘆悉赦沙門不殺爲
碑所遺此殆佛圖澄之流以神通示濟度者耶

北齊婁公造無量壽佛像碑陰

右碑陰有唐李北海邕書龍興之寺四大字在青州府
北門外龍興寺俗名大佛寺

北齊造石像記

右碑齊武平七年十一月二十三日嵩岳之南邑師僧
智都邑主宋始興合比丘邑子共一百人等造石佛像
一區而姓名之異者有訾蘭犢儀子鳳魏阿奴王阿米
范山虎陳狗子之類概稱邑子則里巷間人耳洛陽伽
藍記崇真寺比丘惠凝死一七日還活經閻羅王檢閱
以錯名放免具說過去之時見一比邱云是禪林寺道
宏自云教化四輩檀越造一切經文中像一區閻羅王

曰沙門之體必須攝心守道志在禪誦不干世事不作有爲雖造作經像正欲得它人財物既得他物貪心卽起旣懷貪心便是三毒不除具諸煩惱付司入黑門獄然則世之借造經像以求財者可猛省矣

隋曇詢禪師碑

右碑題隋栢尖山寺曇詢禪師碑銘隸書無書撰人姓名按碑云禪師姓楊諱曇詢宏農華陰人年二十二逢曇淮法師于霖落泉寺證悟至文皇御宇敕儀同三司元壽齋信香迎入大內云云開皇十九年年八十無疾而逝弟子澗休道願慧方等共勒此碑文體整麗字格工好開唐人畦逕亡友王季寫以此碑見示已二十餘年矣急爲錄人恨吾友不及見之也

隋伏波將軍陳府君墓誌序

右碑題云前陳伏波將軍驃騎府諮議叅軍陳府君墓誌序儀同三司周彪撰無書人姓名序云君諱詡字孟和潁川許昌人祖僧亮齊輔國府行佐父敷前梁儀同君天才儁拔有集廿卷起家爲岳陽王記室梁國蕃周將佐送款武成元年授則都督衛州東征失律同旅督將七十二人浮艦相屬陳王曇瑱于望國門並害諸士君子刑所自陳蕢死俄而授招遠將軍加伏波將軍遷驃騎府諮議 國云亡總管秦王招賢慕士迎還并州辭老還鄉開皇廿年九月卒于檀溪里年七十六以十

二月十八日歸葬高陽鄉遺命不許立銘云云而碑陰則載君叔三人爽子暢孝遠遠爲梁驃騎大將軍君弟二人某譯息五人孝柴孝騫君卿曜 五敏女五人禮閨藏閨敏閨四閨善才因叔及叔母因女及女夫而息之婦則失載焉君妻瑯琊諸葛氏孝騫所生李夫人文在末行按詡祖父仕于齊梁詡則由梁而周而陳而隋身歷四朝在隋立碑題曰前陳可見古人待蕃國之厚故宦之寬元世祖時中書省檄諭中外江南旣平宋宜曰亡宋何也碑云詡有集二十卷爲時所重而唐藝文志不錄其姓名古今抱才之士湮沒無聞者可勝數哉

隋勝福寺舍利塔銘

右碑題云勝福寺舍利塔下銘孟弼書其畧云惟大隋仁壽元年歲次辛酉十月辛亥朔十五日乙丑皇帝普爲一切法界幽顯生靈謹于青州逢山縣勝福寺奉安舍利敬造靈塔願太祖武皇帝元明皇后帝后太子王子孫等內外臣庶六道三塗人非人等生生世世值佛聞法同升妙果云云易曰王假有廟書曰鳥獸魚鼈咸若其道有本其效有漸卽孟子所謂親親而仁民仁民而愛物也隋高祖不能累仁積德以貽後人徒托于安舍利建靈塔未矣卒至二世而亡與暴秦無異足爲後世事佛之鑒碑特完好可愛都少卿積數十年訪求僅得隋碑四種而予于汲古毛氏又錄此碑在都氏所錄

之外信乎古碑之湮沒者多也

隋羅處士墓誌

右隋處士羅君墓誌云君諱靖字禮襄陽廣昌人高祖長卿齊饒州刺史曾祖宏智梁殿中將軍祖養父靖學優不仕有名當代碑字絕類褚河南然父子皆名靖為不可曉字禮下闕一字洪氏云拓跋魏安同父名屈同之長子亦名屈祖孫同名此胡人無足言者羅君不應爾也余按林邑王楊邁死子咄立思慕其父改名楊邁此胡人習俗而羅君為可駭已集古後錄云羅君以仁壽四年卒夫人以龍翔二年葬蓋守志五十有九年而以壽終亦可尚也

隋李淵為子祈疾疏

右疏云鄭州刺史李淵為男世民日患先于此寺求仙蒙仙恩力其患得損云云大業二年正月八日建按新唐書高祖于大業中口歷岐州刺史滎陽樓煩二郡太守召為殿內少監衛尉少卿舊唐書大業初為滎陽樓煩二郡太守徵為殿內監而于大業之前累轉譙隴岐三州刺史並未嘗云為鄭州也据疏可以補二書之漏仙字古今字書所無鎮江甘露寺梁鐵鑊銘佛字皆作仙

隋滎澤令常醜奴誌

右常醜奴誌在興平縣崇寧寺壁閒摩讀其文竊嘆勝

國之臣不能自持出而應新朝之命不得志而死者至于今如一轍也醜奴本鄯善右族祖黑獺父歡爲魏大臣醜奴于周保定元年起家建德初遷天官府入隋引退至開皇十九年詔以周代文武普加復選蒙授都督轉爲榮澤令以大業元年年八十有六而卒追溯奉詔之時年已八十矣豈難守止足之戒高不仕之節而不然者或門戶計深子孫勸切有所不得已耳碑云扶風始平人始平卽今興平也

隋鉗耳君清德頌

右碑題云大隋恒山郡九門縣令鉗耳君清德之頌大業六年建序云君名文徹華陰朝邑人本周王子晉之

後避地西戎世爲君長因以地爲姓按王氏又有後周溫州刺史烏丸僧修乃梁太尉王僧辯之弟因父神念爲護烏丸校尉卽以爲姓江東士族首稱王氏淪陷之後姓遂改易如鉗耳烏丸兩君身貴名立不思追改良可怪也

隋緣果道場碑

右碑題隋江夏縣緣果道場七層磚塔下舍利記無書撰人姓名碑云道場者梁天監十二年長史劉端捨宅爲寺也以大業九年昭陽之歲江夏緣果鄉長劉大懿等遵依勅旨共三鄉仕民奉七層磚塔安鎮此地次有清信弟子黃慧龔慧俊慧達等兄弟四次感得舍利六

枚以是年六月八日永寔基下也按漢晉以後僧尼爲
寺道士女冠爲觀隋改法雲慧日爲二道場金洞玉清
爲二元壇至貞觀十二年復寺觀舊名則隋時立寺皆
名道場也葉子奇草木子云僧之有舍利由其心源澄
寂祕耀含靈真積力久結而成之及其火化炳然獨存
此碑云或于食內或行至途中或于所住宅感而得之
斯亦奇矣子何敢盡信

隋李靖上西嶽書

右書無年月自稱布衣李靖則未仕隋殿內直時也藥
師嘗謂所親曰丈夫遭遇當以功名取富貴何至作章
句儒卽書中建義橫行仗劍竭節之意乎劉餗記衛公

以箋訴神請告以官位詞色抗厲卽書中三問不對將
焚其廟之說乎餗又云後有聲曰僕射好去顧不見其
事近怪朱彝尊曰衛公以高祖起兵上書告變則其心
無妄覬神器可知嘗疑此書之僞予謂英雄舉動或有
出人意表者姑錄之行書宕逸絕羣自是俊物人閒有
三本潞州者刻于崇寧爲最佳滕縣者刻于紹聖而嶽
廟則近年所刻爲最下予所收則潞州本也

隋梁羅墓誌

右碑題隋鷹揚郎將義成子梁君墓誌大業四年八月
建今在西安府城外杜曲正書猶帶八分其字率多假
借如鷹揚前作陽後作楊宣政元年作正萬頃作傾羽

儀作議不瘳作抽乾坤齊固作個禁旅之禁作禁樊川之樊亦作樊似非達于文義者而其書頗不俗何也至有大漸之期春秋六十有一大漸出尙書顧命恐非人臣所宜稱然列子云季良得疾七日大漸固已先于此志矣而後人通用之者不一如蔡邕作胡公夫人靈表云遂大漸兮速流王儉褚淵碑云大漸彌留任昉作竟陵王子良行狀亦云大漸彌留沈約作安陸王緬碑云頻焉大漸盧藏用作蘇許公碑云大漸之始遺令遵行固未足爲此誌病也

光緒歲在丁亥仲春之月吳縣朱記榮槐廬家塾重刊
金石錄補卷第九終

金石錄補卷第十

跋尾

槐廬叢書

崑山葉奕包九來著

吳縣朱記榮校訂

唐少林栢谷塢碑

唐褚遂良枯樹賦

唐從幸九成宮長孫無忌等題名

唐褚遂良陰符經

唐汝南公主志

唐砥柱銘

唐文皇屏風帖

唐溫陵侯龍君碑

唐太宗幸慈德寺御製詩

唐晉祠碑陰

唐淤泥寺心經

唐老子西昇經

唐兒寬贊

唐破邪論序

唐褚遂良摹蘭亭序

唐薛稷蘭亭序

唐岱嶽觀造像記

唐冠軍將軍許洛仁碑

唐騎都尉李君墓誌

唐少林寺栢谷塢碑

右栢谷塢碑題云唐太宗文皇帝賜少林寺栢谷塢莊御書碑記開元神武皇帝御書額所謂碑紀者卽少林寺碑上所載太宗爲秦王時討王世充宣諭寺僧之文也此碑前錄告文附賜地水碾還寺教書武德八年二月十五日兼記室參軍臨淄侯房元齡宣又主簿元道白奉行謹詔則答以依詔二字又陝東道大行臺尙書省牒付少林寺并牒秦府留後則武德八年二月二十一日也又司戶牒少林寺則是月廿七日也皆列錄事錄事參軍令史主事判屯田史尉丞姓名後附開元十一年十二月四日內品官陳忠牒少林寺一行則立碑之年月也或云告文非太宗書中間行草世民二字

則御書耳按諮牒後凡錄事令史等姓下皆另一筆書名似與告文相類但告文書法迥出諮牒文上而開元皇帝又御書額以紀之爲文皇書無疑諮牒文必胥史所作而字畫精拔如此宜學士大夫以書知名者之多也

唐褚遂良枯樹賦

右枯樹賦後云貞觀四年十月八日爲燕國公書旁注云肆伯陸拾柒字庾子山此賦有名江左得河南書可稱兩絕晁補之云真蹟藏壽春魏氏開封丁禹錫毘陵胡承之刻之王元美從華補庵處真蹟模勒于石按丹陽蘇頌子容引徐浩書品云中宗以二王墨帖三十卷賜中書令宗楚客楚客裝作屏風十二扇以褚遂良所書枯樹賦爲脚王元美則云武延秀集右軍大令墨跡于屏風以此書裝脚未知孰是

唐從幸九成宮長孫無忌等題名

右題名在九成宮醴泉銘之碑陰太宗命從幸中書門下及三品文武官并學士自書其官名于碑凡四十六人而太尉長孫無忌等七人亦附列焉

唐褚遂良陰符經

右陰符經河南有草正二書草書題云貞觀六年九月廿八日臣遂良奉勅書五十本正書題云大唐永徽五年正月初五日奉旨造尙書左僕射監修國史上柱國

河南郡臣褚遂良奉旨寫一百廿卷蘇黃米蔡虞薛諸公題名而不著姓河南書夷猶婉暢姿態橫生此經正書小于顏平原仙壇記嚴整中不乏風致草書步伍秩如減繁黜怪神品也但符與符異解陰符作陰符豈二字有通用之說耶

唐汝南公主誌

右汝南公主誌無書撰姓名宣和書譜海岳書史皆云虞世南書藁本也碑題云大唐故汝南公主墓誌銘又云公主皇帝之第三女也按列傳太宗二十一女汝南公主居第二此云第三豈傳誤耶後云貞觀十年十一月丁亥朔十六日米元章云此蓋卒日猶未言葬也真

蹟在故相張公孫直清處又有小字赫赫高門云云在裴相家是其銘此碑闕焉有幾元題云崔十八丈綽每送子兄弟下第東歸必云此去獲見汝南帖何減于及第耶所惜者闕其銘文耳咸通二年春于存神室輒獻子凝良足嗇愛也幾元不知何許人此誌在唐已爲時所重况今日乎近于嘗熟錢遵王處見宋揚銘文皆全叩碑題之次有諮議叅軍柳顏言釋智果秘書監虞世南書三行又改添三字古本之妙如此

唐砥柱銘

右砥柱銘貞觀十二年特進魏徵撰秘書正字薛純書董弁云其字因山鑿鑿就其窪平隨多少置字故不成

金石錄卷第十
行又云唐以書學相高刻石之文此其最大者也按薛
純書辨法師碑又名純陀歐陽公評其書似我家蘭臺
當時伯施登善皆讓之至于柳誠懸酷愛其書恐失銘
次別書于石後人得此者卽以爲柳書而純之名不甚
著于後何也

唐文皇屏風帖

右屏風帖南宋祝寬夫云從兄季平于紹興初爲江西
漕屬以重價得于北人南渡者凡十一幅皆素絹也後
嘉泰中王允初摹勒于餘杭縣鄱陽姜堯章云屏風帖
刻于石稍出鋒鋸故至今猶不乏丰致按貞觀十四年
四月二十三日上自爲真草書于屏風以示羣臣多指

述前代理亂得失之蹟去寬夫題跋之歲爲淳熙九年
共五百四十二年而真書已不復見草書僅存此數則
自淳熙至今又五百有餘歲卽此草書未知散亡何處
而是帖傳流人間猶足爲治朝龜鑑洵模勒之功難泯
也至于筆法道縱神采煥發觀者當自得之石刻在餘
杭縣永安寺地中發出置縣廳之左

唐溫陵侯龍君碑

右碑題云唐溫陵侯龍君碑記太常博士歐陽詢撰并
書貞觀十五年九月初四日立碑云國家所賴以康黔
首興太平者良二千石也二千石之良在盡物理洞人
情持廉秉公宅虛懸照又云將惠安之安用武健而恣

金石錄卷第十
五
睢之又云俗何爲而醇以務實而醇俗何爲而澆以務
虛而澆俗之澆虛也士不砥躬行而飾槃輓吏不脩民
事而工媵阿議論切至皆中時弊其稱龍君也爲政廉
平風裁頗峻而存大體號爲長者莫之敢私俗信鬼公
嚴戢之郡城靈門外空地爲豪右築室占有浮梁渡者
苦迫迫壅滯輒壞公盡毀豪室民始無患又云公在貴
不知有公公去而後知公也此碑從徐學士立齋補入
惜系裝成者中有脫簡故失龍君之諱字族里今天下
弊極矣安得龍君者數百人散于州縣俾民稍蘇也故
節錄其文以見直道在斯民斷無有良吏去而不思者
千載之下尙思慕之况當時受其撫綏者乎書爲率更

少年之作娟秀拔俗固自不羣也

唐太宗幸慈德寺御製詩

右太宗詩額云大唐太宗文武大聖大廣孝皇帝御製
詩題云貞觀六年幸慈德寺舊宅四韻又云貞觀十六
年重幸慈德寺故宮十韻按慈德寺在慶善宮側太宗
登極後夢太后若平日旣寤潛然不自樂詔有司創寺
焉寶太后傳云后于諸子中篤愛太宗後太宗過慶善
宮覽觀欷歔顧侍臣曰朕生于此今母后永違育我之
德不能報衆皆流涕詔有司大發倉賑貧瘠爲太后報
焉本紀兩至慶善宮與詩合前詩流連故宮後詩鋪揚
大業有漢高還沛之思

唐晉祠碑陰

右晉祠之銘碑陰題名云司徒太子太師上柱國趙國公臣無忌太子太保上柱國宋國公臣瑀特進太子詹事兼左衛率上柱國英國公臣勣光祿大夫刑部尚書上柱國鄖國公臣張亮禮部尚書上柱國江夏郡王臣宗道太常卿駙馬都尉上柱國安德郡公臣楊師道正義大夫守中書令太子左庶子兼攝吏部尚書護軍臣馬周凡七行皆當日侍從祠中書者字體不一必無忌等手書也漢鮑昱怪司隸下著姓魏勸進表自華歆而下幾百人皆不著姓唐李緯云左右僕射師長庶僚宰相表狀之中不著姓意王公與僕射同而此碑之鄖國

著姓又何也晉祠在今太原府西南四十里距太原縣八里蓋唐叔虞之祠也顧亭林云其廟負山東面者晉水之神南面者唐叔之神後晉天福六年封唐叔爲興安王臺駘爲昌寧公而宋時又封晉水爲顯靈昭濟聖母飾爲婦人之像今之人但言聖母而不復知唐叔爲古先有土之君矣

唐淤泥寺心經

右心經後題云大唐貞觀二十二年三月吉日立勅淤泥禪寺三藏比丘號錦峯禪師又云宮官張功謹敬德監造無書人姓名按貞觀止二十三年碑誤作三十二以三字改成式字顧炎武曰予見兗州龍興寺修三門

記太平興國七年刻亦以八字改成七字古人碑碣之
文有草草若此者碑在今京師城內西北隅秀峯寺

唐老子西昇經

右老子西昇經褚遂良書後有裴度柳公權跋米芾云
與閻立本畫圖同在馮當世家是唐初書畫與柳跋皆
真蹟宋熙陵云河南喜作正書西昇經與孟法師碑聖
教序爲最著其家傳有緒熙陵應不妄也裴所題云元
和十四年閏正月三日持平記或云持平其初字也蓋
與中立相似云

唐褚遂良書兒寬贊

右兒寬贊褚遂良書真蹟藏楊文貞士奇家刻于吳門
者其鋒鏘盡露贊闕五字乃宋時廟諱于真蹟中刮去
莫能補也河南時以八分爲正書如三龕記孟法師碑
皆極嚴重何異大臣冠劍儼立廟廊有不可犯之色此
則神道筆緩風致奕然海岳云如熟馭陣馬舉動隨人
時有一種驕色庶幾得之

唐破邪論序

右破邪論序太子中書舍人吳郡虞世南撰并書永興
小楷世不多見此序尤爲永興得意書按序有太史令
傅奕學業膚淺識慮非長乃穿鑿短篇憑陵正覺法師
愍彼後昆撰破邪論一卷夫胡僧呪人奕破其妖妄識
者躋之今反以爲邪世南從而和焉何也論載釋氏藏

經中

唐褚遂良摹蘭亭

右蘭亭序米元章書史云蘇耆家蘭亭三本一本在舜元房題爲褚遂良摹予跋云樂毅正書第一此乃行書第一也此書下真蹟一等非真知書者未易道也以其本刻板見而求者卽與一本世謂三米蘭亭云

唐薛稷蘭亭敘

右蘭亭敘唐之搨本最多而薛本不甚著晉江曾宣靖公收藏李後主御庫墨帖有薛稷搨定武本爲墨池水鑑諸家俗筆鉤勒失其神理此本乃曾氏從真蹟上石猶可想其行筆遺意蓋稷爲褚河南甥絕類同州聖教序而精警勝之所謂何無忌酷似其舅者耶述書賦云少保師褚菁華却倍非虛語也

唐岱嶽觀造像記

右記聖歷元年冬大宏道觀主桓道彥奉勅修齋造像充州團練使高晃等所記也顧寧人曰此記有云設金籙寶齋河圖大醮黍黍古七字後人不知妄于左旁添鑿三點口非一筆予按張參五經文字七作漆而唐碑書七字作漆者甚多後人省筆作柒矣此記漆字三點不甚偏似非添鑿蓋用武后所改數目一二三四等字也寧人又云睿宗先天二年詔凡數目作一十二十三十四十字是知前此皆用一二等字矣予按碑中景龍

三年造記有大德卅九人七日七夜神龍元年記有卅九人九日九夜轉經行道之語當時二十三必皆作廿卅故先天之詔及之不止爲一二等字可知也

唐冠軍將軍許洛仁碑

右碑題云唐故左監門將軍冠軍將軍下公諱洛仁字濟博陵安喜人歷敘其從征討逆取汾州平栢壁破宋老生軍擊蒲州大陳及平京城擒竇德降王克平薛仁果皆勲高諸將太宗引于內營授之禁旅貞觀二十年中朝夕趨侍驅馳密勿曾于武軍城下進馭馬一匹聖旨號曰洛仁馭爲之刻石圖像及薨贈贈加于常典諡曰勇公陪葬昭陵故此碑猶在今醴泉縣文皇陵內則

洛仁者亦折衝陷陣之勞臣而唐史不爲立傳卽高文

紀中亦無其名

博按洛仁附見許世緒傳葉偶失考耳

微此碑幾不知有

洛仁名字然則一代之興攀鱗附翼依日月之末光當

時甚烜赫而其後湮沒無聞者可勝計哉明末苟好善

脩醴泉志云昭陵諸碑其字尙有存者僅二十一片許

洛仁姜遐各存九百餘字顧亭林曰苟氏脩志在崇禎

十一年又二十六年而余至陵下時值雪後空山無人

未及徧訪僅見李衛公一碑其下截俱劓去土人云他

碑俱不存存者劓其字矣陝右馮孝廉文錫知予好之

篤求之勤遠寄數碑皆二十一片中物爲亭林身至陵


下而不得見者予何其幸乎此碑止存上截除題共十

九行行四十五字字之在下隱隱可識而剝蝕者每行約十一二字不等其存者與苟氏之志相符亭林所謂皆不存存亦剝盡特土人給之耳予雖老而貧猶願一至陵下摩挲諸碑作一詩弔之又按隋唐之際名字混淆而一字字者絕少予初讀唐宰相世系表房玄齡字喬竊疑玄齡以字行其名乃喬耳證之舊書果名喬輒自快以爲此疑可釋及考玄齡碑又與新唐書合洛仁之字濟或者亦以字行行之久且著遂相沿以字爲名耳王充去世字固避太宗諱竇德亦去建字何也祖彪彪字缺一筆而杖號參墟號字復不缺當時似無一定之例可知已梁師都從父弟亦名洛仁

唐騎都尉李君墓誌

右誌云君諱文字緯隴西成紀人卒于永徽二年葬于麟德元年無書撰人姓名字彷彿河南而結構微弱漢以後一字字者絕少而李君字緯斯亦奇矣

光緒歲在丁亥仲春之月吳縣朱記榮槐廬家塾重刊
金石錄補卷十



金石錄補卷十一

跋尾

槐廬叢書

崑山葉奕包九來著

吳縣朱記榮校訂

唐郭君之碑

唐吳廣碑

唐徐王元禮碑

唐鄭惠王石塔記

唐亳州錄事參軍殘碑

唐九門縣西浮圖碑

唐兗州修孔子廟詔表

唐長子縣白鶴觀碑

唐王君墓誌

唐梁府君墓誌銘

周姜遐碑

周榮德縣丞梁君墓銘

周王方慶萬歲通天帖

周勅使麻先生祭嶽詩

周高延貴造佛像疏

周姚元景光宅寺造佛像疏

周百門陂碑

周上騎都尉相里瑞碑

周馬元貞淮瀆投龍記

唐郭君之碑

右碑額云郭府君之碑書撰姓名殘闕後云乾封二年
口月口口建朱彝尊曰首二行斷裂君之名字世系皆
闕知爲郭君者碑額在也碑有揮霜戈而斬老生之語
蓋從太宗攻霍邑者按舊唐書宋老生棄馬按塹甲士
斬之新唐書則稱爲劉宏基所殺温大雅創業起居注
云老生攀繩上城軍頭盧君諤所部人跳躍及而斬之
不知揮刃者之爲郭君而君之名以石裂終不傳爲可
惜也

唐吳廣碑

右碑不著書撰人姓名集古錄云廣字黑闥與程知節
秦叔寶等從太宗征伐與殺建成有功高宗時爲洪州

都督以卒然唐書不見其名字惟會要陪葬昭陵人有
洪州刺史吳黑闥亦不知其名廣也予錄許洛仁碑謂
古來勞臣志士苟非碑碣幸存則名字事蹟無以見于
後世此碑當已滅沒得歐公而不朽豈非幸耶

唐徐王元禮碑

右徐王元禮碑崔行功撰趙仙客書元禮高祖子也以
碑證傳悉同集古錄云傳既簡畧又都無法如碑云持
節徐譙泗三州諸軍事而傳獨爲徐州此其失也碑云
贈太尉使持節大都督冀相貝滄德棣魏博等八州諸
軍事冀州刺史傳云贈冀州大都督蓋爲一州刺史而
兼督八州軍事都者兼總之名也如碑之書贈官是矣

此特小故而予區區辨之者前史失之久矣蓋歐公與
宋公祁同館託云前史其實指新書之失也又云李靖
傳爲慰撫使碑云安撫靖時未嘗有慰撫使之官不可
不正其封衛國公也授濮州刺史爲世襲後雖不行皆
史宜書予考舊史濮州之授未嘗遺漏則專指新書可
知以歐宋道合志同猶不能而加詳訂而存其說于集
古錄者不一然後嘆文章得失知之者既少校正者爲
更難也

唐鄭惠王石塔記

右石塔題云唐故贈司徒荊州大都督充安二州都督
鄭潞絳三州刺史上柱國鄭惠王石記後云咸亨四年

十月八日檢校功德僧洪滿建按敘王諱下闕二字爲高祖第十三子往任潞州日于此山奉爲先聖敬造石舍利塔并安敕賜舍利三七粒造藏經三千卷云云考本傳王諱元懿子璪嗣而碑列十子名曰璪琛珪琨璿琳璿珩弟五子樂陵公闕其名唐書宗室世系表樂陵公名球比傳爲詳若充安二州大都督則又傳之所遺也碑在潞安府

唐亳州錄事參軍殘碑

右碑八分書錄事姓名殘闕咸亨四年立顧亭林曰中有夫人恒農楊氏恒農本宏農避太子宏名改之予按魏書有恒農郡又有東西恒農隋復改宏農註因魏西

桓農置故李仲璇孔子廟碑曰恒農太守萬鈕于瑾華嶽頌曰恒農楊子所恒農之名自古有之雖唐神龍初避敬皇帝諱開元十六年已復故名矣此碑立于咸亨又何拘忌耶或作文者偶用古郡非爲國諱也

唐九門縣西浮圖碑

右碑題云大唐九門縣合鄉城人等爲國建浮圖之碑應詔四科舉董行思撰清河傅得節書上元三年建集古云唐有兩上元碑云歲在丙子乃高宗之上元也浮圖在智矩寺中寺已廢

唐兗州修孔子廟詔表

右兗州孔廟碑詔表文四道皆隸書後云儀鳳一年訖

功其武德九年二月詔則高祖以孔德倫爲褒聖侯也
乾封元年正月詔則高宗封宣尼爲太師增修廟貌免
孔氏賦役也其表則太子宏請勒碑而勅依請也其文
則乾封元年二月高宗遣司稼正卿扶餘隆以少牢告
祭也按孔氏侯封漢曰褒成又曰褒亭魏曰宗聖隋曰
紹聖名氏之見于碑者褒成曰損宗聖曰美紹聖曰嗣
愬德倫嗣愬子也推古人立碑之意以金石壽當不朽
然山有時而童巔水有時而回川峴山之碑今安在耶
雖宣尼大聖無俟旌揚而堯陵禹廟碑已散亡惟孔林
巋然如故金明昌中大風拔屋碑仆而字無害若有陰
相焉趙氏錄有孔宣尼碑崔行功撰孫師範書子亦有
之

唐長子縣白鶴觀碑

右碑額隸書大唐潞州長子縣白鶴觀之碑碑文正書
無書撰人姓名并無建碑年月惟文中有垂拱二年長
子縣營創崇基造立尊容等語蓋爲則天武后祝釐設
也按趙錄有白鶴觀碑註八分書非此碑明矣然是碑
爲友人朱悟庵所惠係裝成者恐割去碑之前後無可
考也

唐王君墓誌

右碑額王君墓誌四字正書然文君諱師字可法并州
太原人晉王濬之後顯慶四年卒與夫人李氏以垂拱

三年合葬于四人英舉英素三朗四朗皆柱國將軍其
文云三韓背誕八部挺災君橫戈載路挺劍先鳴以功
授上柱國關一字慎校尉蓋從征高麗將士也夫以唐文
皇之雄武親征不得志高宗命將出師一鼓而滅之當
時高麗秘記曰不及九百年當有八十大將滅之高麗
自漢至唐有國九百年李勣年八十果符斯讖然則帝
王舉動其勝負固有數不可徼倖者耶王君之從征在
貞觀與永徽未之詳矣

唐主簿梁府君墓誌銘

右碑題云大唐故朝議郎行澤王府主簿上柱國梁府
君并夫人唐氏墓誌銘四品孫義陽朱賓撰文五品孫

滎陽鄭莊書誌云君諱寺字師暕雍州藍田人咸亨四
年授文林郎日者東風爽候西旅不庭二軍乏坐甲之
資七萃興懸磬之嘆君指困推誠躬親餽餼云云按史
是年大風落太廟鴟尾而西南姚州蠻寇邊以梁積壽
爲行軍總管以代之豈梁君于是時服勞王事乎以垂
拱四年十月終年四十有一唐氏名惠兒先一月卒卽
合葬于終南山信行禪師林側梁君壯年徂謝當未有
子朱賓鄭莊異姓稱孫必其母爲梁君之女而襄此慎
終大事也唐制辨貴賤敘勞能則有品有爵有勳有階
官定九品品分正從自正四品以下有上下爲三十等
如同中書門下三品外更無以品字入銜者此之稱爲

四品五品而不言其所守何職殊不可解選舉志國子學生以京官四品帶三品勲封之子爲之大學生以五品以上子孫爲之或賓與莊皆四品五品官之孫而未入國子監者耶

周姜遐碑

右姜遐碑姪邲國公晞撰書碑已斷裂失其上半截矣而祖父子姓之名尙備碑云公諱遐字柔遠祖暮父行本子皎晦春秋五十有二卽以天授二年十月十日葬于昭陵神蹟鄉之舊塋按史行本名確以字顯而碑正書其字遐附行本傳云子柔遠武后時至左鷹揚衛將軍攝地官尙書通事舍人內供奉而已未嘗云柔遠名

遐也且暮傳止云子確而碑云故伯父太子僕嘗指公謂人云云似暮尙有子而史遺之東宮僕寺有僕一人從四品卽所謂太子僕也晞爲簡之子嗣行本爵史亦不載碑雖殘泐猶足以證史之闕如此

周梁府君墓誌

右誌題云大周故珍州榮德縣丞梁府君墓誌銘無撰文書人姓氏亦無建碑年月按碑云君諱師亮字永徽安定烏氏人萬歲通天元年九月卒二年三月葬序文駢麗初唐佳作也顧炎武曰以本朝年號爲字猶漢袁紹之字本初古人之無避忌如此碑在百塔寺

周王方慶萬歲通天帖

右王方慶進晉王右軍已下十帖承傳之詳具岳倦翁
跋中文待詔衡山以爲法書第一宋之評書家無論及
者自建隆以來世藏天府至建中靖國始流傳人間也
原本在元岳仲遠處後歸無錫華氏米元章所謂唐之
雙鈎下真蹟一等者

周敕使麻先生祭嶽詩

右詩五言十四韻守博城縣令馬闕作麻先生者久視
二年記中所稱神都青元觀主麻慈力也武后遣之至
觀修醮神都卽東都故有伊水嵩巖之句詩在岱觀碑
朝東側面其文剝蝕不全矣

周高延貴造佛像疏

右碑無書撰人姓名書極醜惡文用排偶疏云渤海高
延貴知滅滅之常樂識空空之妙理眷茲朽宅思樹法
橋敬造石龕阿彌陀像一鋪具相端嚴云云長安三年
七月十五日敬造自梁隋以來佞佛造像倡于宮闈而
臣下效之旣知滅滅之樂空空之妙乃執像以爲佛在
是何耶多見其不知佛也

周姚元景光宅寺造佛像銘

右碑無書撰人姓名銘詞甚古雅書亦勁秀序駢麗中
多警拔語乃朝散大夫行司農寺丞姚元景于光宅寺
法堂石柱造像一鋪後云長安四年九月十八日書未
知卽姚丞手筆否

周百門陂碑

右百門陂碑題云衛州其城縣百門陂碑銘前咸均進
士隴西辛怡諫文張元琮記又一行泐二元長安四
九又泐九二字銘後云孫去煩書此碑款式與他碑異古
來兩人共爲一碑文者如敘頌之類必分屬之既云張
元琮記不明書其所記者何事長安爲武后年號用其
所改年月等字而九字下必日建二字似不應列在銘
序之前但碑文洋洋千五百言才子之文也水經注云
汲郡其山下泉流百道故謂百門有古碑滅沒信哉

周上騎都尉相里瑞碑

右碑額云上騎都尉相里府君之碑碑文漫滅特甚可

識者諱瑞字鳳威夫人任氏而已卒葬年月書撰姓名
俱無考而中有而塋字知爲武后時人也碑在今汾陽
縣小相里之北太師墓太師者卽錄中五代建雄節度
使相里金也

周馬元貞淮瀆投龍記

右記云天闕二年辛卯四月一日口臺觀主馬元貞奉

勅大周革命爲聖神皇帝五嶽四瀆投龍作功德于此
淮瀆云云聖神者武氏也庚寅九月改元天授始定國
號爲周此碑天字下所闕乃授字也元貞于是年二月
謁曲阜夫子廟有題意卽奉敕而來爲一時題識亦羽
流之好事者書却不俗存之

光緒歲在丁亥仲春之月吳縣朱記榮槐廬家塾重刊
金石錄補卷十一

金石錄補卷十二

跋是

槐廬叢書

崑山葉奕包九來著

吳縣朱記榮校訂

唐沂州太清觀造像碑

唐大通禪師碑

唐比丘圓滿碑

唐口部將軍功德記

唐尊勝陀羅尼幢

唐比丘尼法琬碑

唐蕭府君墓誌

唐遣道士楊太希燒香疏勅

唐睿宗賜司馬承禎詩

唐契苾明碑

唐安祿山造彌勒像疏

唐軒轅彌明詩

唐少林寺戒壇銘

唐醴泉寺寶誌公碑

唐法藏禪師碑

唐贈潤州刺史馬公碑

唐華嶽精享之碑

唐岱嶽觀投龍合練記

唐大將軍吳文碑

唐陳昭題名

唐沂州太清觀造像碑

右碑在蒙陰縣南樓社太清觀中唐神龍元年九月清
信仕顏文達等造老子三尊像而立然碑題則云沂州
判新泰縣按蒙陰卽魯之顛與漢爲縣唐省入新泰故
地理志無之後析新泰復爲蒙陰或南樓社故唐新泰
地也予從錫鬯朱氏知此碑屬蕃久弟搨之來向者錫
鬯但云聞蒙陰有唐碑實未之見故其雜記亦未明注
爲何碑非予好之之篤蕃久不以予之所好爲迂而必
致之其不湮沒者鮮矣錫鬯供奉內廷當日見所未見
顧不得與予摩挲是碑以慰其向時欲見之心或反羨
予未可知也癸亥臘月朔日

唐大通禪師碑

右碑額云大通禪師之碑行書碑文張說撰盧藏用八分書凡三十行行五十二字銘後紀元及題名皆殘泐矣中有神龍二年二月廿八日跌坐化滅之語故編于此禪師諱神秀按禪家所謂五祖宏忍傳于能為六祖又傳于秀為北宗即大通也

唐比邱圓滿碑

銘石殘缺不能一半在華嚴寺敗垣中失書撰姓名內有神龍二年及鎮國太平公主等語當是中宗時碑也

唐口部將軍功德記

右碑題云大唐口部將軍功德記郭口口文及書後云

大唐景龍元年十月十八日建序云大唐

兵中軍副

使右金吾衛將軍上柱國遵化郡開國公

部珣于神

龍二年三月與內子樂浪郡夫人黑齒氏敬造三世佛像又云夫人郡大將軍燕公之中女按諸夷蕃將黑齒常之于垂拱中為武衛大將軍封燕國公百濟西部人

唐尊勝陀羅尼幢

右幢在常熟縣之興福寺景龍八年二月廿日女弟子徐十四娘為亡夫許二郎造陸展行書予于順治丁亥過幢下逾三十年而景龍等字已殘泐矣金石必弊信然

唐比邱尼法琬碑

右碑題云大唐故比丘尼法琬法師碑文靈安寺沙門承遠撰後云左衛翊壹府翊衛彭城劉欽旦書景龍二年五月十日比丘尼仙晤迦界等建按碑法師諱法琬神龍皇帝之三從姑鄭王亮之曾孫史稱鄭王元懿爲小鄭王又曰惠鄭王以別于亮亮之子孫皆有諡而無傳法琬奉敕爲尼創建祠宇又剃度女僧三七爲弟子歿則銘碑垂後唐之佞佛此爲尤異錄之以示一慨碑有天分斤極斤應是斗字漢隸并升二字易訛故正書改升爲斗至唐承襲已久不應如此之謬也

唐蕭府君墓誌

右誌題云唐故朝議郎行雍州長安縣丞蕭府君墓誌銘中大夫行薛王友顏惟貞撰而無書人姓名又云君諱思亮字孔明祖父皆仕于隋唐爲顯官以景雲二年二月葬按顏氏家廟碑魯公之父名惟貞字叔堅受筆法于舅殷仲容氏以草隸擅名此碑字畫工緻當爲惟貞書也惟貞書武承規墓誌與此碑相似碑近出西安府城南神和原土中

唐遣道士楊太希燒香疏

右疏在泰山岱嶽觀碑南面第三層其文有景雲二年六月二十三日皇帝敬憑太清觀道士楊太希于名山燒香且曰惟靈蘊秘凝真含幽綜妙云云蓋祈禳疏詞也按帝紀是年三月作金仙玉真觀四月作元元皇帝

廟睿宗之好神仙不啻飲食蓋惑于婦寺而然刊碑勒碣至今未毀後之覽者足以爲戒

唐睿宗賜司馬承禎詩

右睿宗賜子微書及送還天台山詩一首都少卿云子游王屋山陽臺宮爲司馬承禎修煉之所宮中有睿宗與子微書及詩碑刻搨之而歸遂傳于世按睿宗嘗召子微問其學術賜寶琴霞帔還山不云有書與詩此傳之疎脫也

唐契苾明碑

右契苾明碑題云大周故嶺南大將軍兼賀蘭州都督上柱國涼國公契苾府君之碑銘肅政御史大夫上柱

國婁師德製文左肅政御史殷元祚書先天元年十二月立按史明祖葛爲莫賀咄特勒碑作特勤父何力碑作河力十二遷爲本輦大夫碑作奉輦大夫史云子聳碑作窠皆當以碑爲正但碑云公三子長曰窠次曰嵩次曰崇史云聳襲爵碑稱涼國公窠固矣碑末又云涼國公嵩立父碑何也且從古碑文無父碑二字考開元改元在先天二年之十一月立碑在前猶稱二年題云大周者明蓋葬于萬歲通天之元年必葬時製文及書故云大周革命并用武后所製之字也顧炎武曰北史突厥傳大官有葉護次特勒唐書突厥傳可汗者猶古之單于其子弟謂之特勒迴紇傳依託高車臣屬突厥

近謂之特勒無君長契苾何力傳父葛隋大業中繼爲
莫賀咄特勒隋書高祖紀突厥雍虞閭可汗遣其特勒
來朝李崇傳突厥遣使謂崇曰若來降者封爲特勒史
傳中稱特勒者甚多而此碑乃作特勒又柳公權神策
軍碑亦云大特勒嗚沒斯皆書者之誤

唐安祿山造彌勒像疏

右疏以大唐先天二年七月十五日安祿山造彌勒像
而記之也後有清遠居士題詩云妖胡作逆罪滔天翠
輦倉皇幸蜀川千載業緣磨不盡却來邀福向金仙居
士不知何許人顏魯公于虎邱題詠同游者亦曰清遠
未知卽其人否新書祿山傳少孤隨母嫁安延偃開元

初延偃攜以歸國與將軍安道買子偕來乃冒安姓更
名祿山觀此疏則祿山來歸蓋在開元之前舊書云與
安道買男俱逃出突厥中道買次男貞節爲嵐州別駕
收獲之年十餘歲以與其兄及延偃相攜而出按造像
祈福必非十餘歲時所能爲故新書特去此語而此疏
有云弟子安祿山則已在改名之後逆臣覆國千古詬
厲其初邀福金仙豈殊於庸衆清遠居士追論于後不
覺其言之沉痛也恐祿山造像之時亦未必遽計及此
搨本雖數言其年月足以証史之誤毛斧季出以見贈
漫書復之

唐軒轅彌明詩

右石刻衡山道士軒轅彌明謁桂林堯君廟詩開元二
年十月彌明白書或言石鼎聯句韓昌黎以彌明白寓
其姓名今觀此詩是實有其人矣但距聯句時蓋百年
昌黎且未生昌黎云彌明年九十餘張南軒攷其歲以
爲失實又謂此詩比聯句格力未老以爲少作豈亦以
年歲推之乎或好事者托彌明以神異其人未可知也

唐少林寺戒壇銘

右碑題云唐少林寺戒壇銘有序三藏法師義淨製括
州刺史李邕書開元三年正月十五日建沙門知通立
石伏靈芝刻字按趙錄此碑有目無跋注云張傑八分
書而予所藏揚本則北海行書豈是銘有二碑耶抑趙

錄刊本之誤耶

唐醴泉寺寶誌公碑

右碑額云大唐齊州章邱縣常白山醴泉寺寶誌公之
碑八分書開元三年十二月建而文撰于睿宗時序有
今唐太極元年歲次壬子皇帝御天下之三載凡一百
九十九年蓋泐誌公寂滅日屈指示衆云某月日去乃
梁天監十三年甲午至壬子爲一百九十九年也文人
喜作隱語乃爾

唐法藏禪師碑

右碑題云大唐淨域寺故大德法藏禪師塔銘八分書
京兆府前鄉貢進士田休光撰文正書無姓名或卽休

光書也開元四年五月廿七日建按序俗氏諸葛蘇州吳縣人爲瑾之後曾祖訾吳郡太守蘇州刺史大父穎隨閩州刺史父禮皇唐少府監丞以名賢後裔不應舍族披緇但云年甫二六奉敕爲濮王度則當時爲后主太子諸王荆染者皆搢紳子弟可知也濮王卽太宗子魏王泰泰以貞觀二十一年改封碑云師于開元二年捨生報齡七十有八則刺度在永徽三年正泰開府置僚屬時也泰于貞觀中恃寵構嫡幾奪位皆太宗有以啟之度僧乃其餘事耳

唐贈潤州刺史馬公墓誌銘

右碑篆額云大唐贈潤州刺史馬公墓誌銘題云故銀

青光祿大夫秘書監昭文館學士侍讀上柱國常山縣開國公贈潤州刺史馬公墓誌銘後云維大唐開元六年歲次戊午十月辛酉朔十三日癸酉葬于洛陽縣古城北五里雙樂村之原按碑與兩唐書異者舊書不及公字新書云字惟白碑云諱懷素字貞規又云年甫弱冠以文學優贍對策乙科爲郡尉丁太夫人憂服闋授麟臺正字少監京兆韋方直好學愛士善飛白書以公旣及冠禮未嘗立字遂大書飛白云懷素字貞規扶風之學士也封以相貽其爲時賢所推重如此則公決不改字未知宋公何據遽曰惟白至于官秩前後爲史遺者甚多碑云以忠鯁除右鷹揚衛兵曹參軍轉咸陽尉

則天時授左拾遺歷殿中轉授考功員外郎在中書與
李乂同掌黃畫檢校吏部侍郎改授大理卿關畿佇材
除虢州刺史入爲太子詹事判刑部侍郎加銀青光祿
大夫兼判禮部尋正除刑部拜光祿卿遷左散騎常侍
秘書監夫官非要職史傳不載若殿中侍御及吏刑二
部侍郎大理光祿爲政刑所繫苟非其人決不遷改懷
素長于吏職不止校勘四部而新書詳列分校秘書各
官反累本傳事跡何也馬公爲儒學重臣元宗眷注以
開元六年七月卒十月葬卽以葬日立碑易名之典或
尙未論定故諡公爲文碑不及載耶如此巨碑八分書
不在韓蔡之下而缺書撰姓名蓋家羽遐所藏搨本係

俗工襲背語句多訛重加是正前幅必爲剪裁所失惜
哉

唐華嶽精享碑

右碑題云華嶽精享昭應之碑宣義郎行華州華陰縣
主簿平陽咸廙撰殿中侍御史彭城劉升書升素以書
名如造觀音像徐州刺史蘇誥碑行于世此碑隸法古
勁無唐人習氣可愛也碑以開元八年春舊相尙書許
國公蘇頲禱雨于西嶽已事而雨故作頌焉其文刻于
後周天和二年頌碑之陰碑之右傍有顏魯公大字題
名又太和六年四月姪男宣義郎行華州參軍琬重修
在碑之下方題名同時則朝議郎行華陰令裴賁丞柳

升主簿霍晃也另題則銀青光祿大夫檢校華州刺史
上柱國李休光也明季地震後古碑大爲俗人所損此
碑與韓擇木二通僅存而余所藏又五十年前拓本字
字精好更可觀耳

唐岱嶽觀投龍合練記

右記無書撰人姓名中有吾皇有意于神仙內給事梁
思陔與道士任無名于泰山投龍合練鑿碧巖壘丹竈
列星柱亘虹梁棟宇已來莫籌其速開元八年七月廿
日畢工蓋煉丹製藥媚上之所爲在宦官羽士亦何足
責都督袁君仰祇帝命鄙矣而不著其名子錄開元七
年李邕孔子廟碑有兗州牧袁君功曹蓋寡疑與此記
同則袁君名元珪也袁君不能以道事君同于婦寺勒
名金石恬不知耻何耶

唐大將軍吳文碑

右碑開元中爲大將軍吳文立宏福寺僧大雅集晉右
軍王羲之行書今已斷裂失上截矣後存羽林郎直將
作監徐思忠等刻字菩提像一鋪居士張愛造云云字
之波磔不及聖教序而結體遒緊勝俗書遠甚傍有碑
在京興福寺之語故俗稱興福寺碑又名半截碑趙嘏
云萬歷末浚西安城濠得之王生堯蕙輩昇寘頰宮傳
揚者衆日就磨泐矣顧炎武曰其文有夫人李氏圓姿
替月潤臉呈花唐人寫狀婦人猶有碩人詩意今人以

爲嫌豈肯作此語耶

唐陳昭題名

右開元九年進士陳昭等慈恩寺題名昭所書也封氏
記神龍已來杏園宴後慈恩塔下題名同年中推善書
者紀之柳氏序訓謂韋肇初及第偶于慈恩寺塔下題
名後進效之段氏雜俎云慈恩寺題名自張苔于寺中
題其同年姓名因爲故事按苔登科在天寶十三載今
觀此碑則題名非苔始也此碑在河南石氏載題名制
度大備明制禮部刻進士姓名于國子監中今以進士
姓名天下所共知停其刻石矣

金石錄補卷十二

金石錄補卷十三

跋尾

槐廬叢書

崑山葉奕包九來著

吳縣朱記榮校訂

唐大盧舍那像龕記

唐長山縣石九級壇頌

唐池州刺史馮公碑

唐淨業禪師塋銘

唐楊將軍新莊像銘

唐高守信造像碑

唐伯夷叔齊碑

唐鄔國長公主碑

唐思恒律師碑

唐東封朝覲頌

唐李邕端州石室記

唐道安禪師碑

唐少林寺碑

唐李府君墓誌

唐敬節法師塋銘

唐三尊真容像記

唐平蠻碑

唐馮公墓誌銘

唐鄭虔題名

唐北嶽神廟碑

唐北嶽神廟碑陰

唐大盧舍那像龕記

右記進士都仲容撰無書人姓名字從左行咸亨三年高宗造像武后助脂粉錢二萬貫上元二年春置奉先寺中記後有河南縣牒開元十年奉勅龍花寺宜合作奉先寺且有河洛上都龍門山之陽等語按杜工部詩黃鶴注馮翊縣龍門縣俱有龍門山而河南縣有龍門鎮薛仁貴傳云絳州龍門人絳州亦有龍門以魯豈注龍門在東都關塞山俗名龍門爲疑閱此碑始知奉先寺正在河南縣工部詩題不謬也

唐長山縣石九級塋頌

石頌序前有佛頂呪語次題云長山縣張超村石九級
塏頌至大唐開元十年歲次闕而止共二十九行行書
每行存二十餘字上下前後皆缺似勒在塏間非別有
碑碣塏主比丘尼王姓失其名祖父皆官族也

唐池州刺史馮公碑

右馮公碑崔尙撰郭謙光書開元十一年十一月十日
建碑云名仁洵字太元又云意得元珠謀參黃石同心
戴舜以爲天子蓋指其子道力與劉承祖占元宗當受
命潛布欵誠也開元初封道力爲冀國公贈其父朝散
大夫池州刺史開元十一年卒卽以是年葬按開元十
年劉承祖坐姜皎事配雷州詔百官不得與卜祝之人
來往而馮氏尙爾建碑直書前事何也此碑分隸圓潤
有骨在戴似胡証之上

唐淨業法師塏銘

右碑題云大唐龍興大德香積寺主淨業法師靈塏銘
正字畢彥雄文開元十二年六月十五日建法師闡揚
大雄氏之教序之甚詳書亦道整有歐褚法惜缺書人
姓名碑云師以延和元年六月見微疾而告滅按睿宗
景雲三年正月改元太極五月改元延和八月元宗卽
位改元先天一年之中三次改元故司馬公通鑑冠以
先天而太極延和則附見于其後乃紀事法也若此碑
直序法師寂滅之時適當延和初改則以爲延和元年

而已碑在香積寺中

唐楊將軍新莊像銘

右碑有銘無序題云楊將軍新莊像銘不具名與字開元十二年十月八日造銘詞溫雅有初唐風致

唐高守信造像碑

右碑八分書廿行前云朝議郎行內謁者監上柱國借緋高守信第二行起則贊頌造佛像之詞共百二十字開元十二年十二月一日則正書也無書撰姓名而八分大類韓擇木

唐伯夷叔齊碑

右碑題云古義士伯夷叔齊二公碑安定梁昇卿纂文及書開元十有三年惟一月既望立衛鶴趙禮范謙刊序云二公諱伯夷叔齊遼東孤竹君之子也按史記索隱引韓詩外傳呂氏春秋伯夷名允字公信叔齊名致字公達夷齊諡也伯叔爲少長之字此碑以夷齊爲諱當必有据又按孤竹城在遼西令支縣應劭云伯夷之國其君姓墨胎氏也遼東西以遼水爲界孤竹在西不得云遼東唐去古未遠邗伯縣令猶能以政事之暇搜訪古蹟表揚義烈如狄梁公治吳毀廢淫祠特留泰伯季札諸廟可以觀其意矣修此廟者縣令太原王公而佚其名惜哉朱彝尊曰碑在今平陽府浮山縣顧炎武曰在蒲州首陽山二賢廟中其文書于碑之兩面云

唐鄔國長公主碑

右碑題云大唐鄔國長公主神道碑銘明皇隸書撰文
姓名殘泐而存中書令修國史等字宰相表開元十三
年張說以右丞相兼中書令則撰文者必說也碑云公
主睿宗之第七女而新唐書傳云第八女與碑異又云
母崔貴妃薨公主方三歲不食三日哀如成人下嫁薛
徹又嫁鄭孝義皆與碑同碑云求之令族嬪于薛氏有
男子四女子五又云改嫁鄭氏均養七子休蔭二宗云
云夫公主改適名節所繫而當時大臣勒諸碑板恬不
知恥至于乃爾可深嘆也

唐思恒律師碑

右碑額篆書鄔縣尉常

闕一字

文無書者姓名及建碑年

月以裝成之本必多脫遺也碑云俗姓顧吳郡人祖元
隋門下上儀同三司祿蕪郡開國公自漢以後開封郡
邑皆實有其地惟崇德褒聖則製二字以別之隋郡國
志無祿蕪郡而此碑點畫未刊二字無可疑者則何也
碑有葬于開元十四年十二月之語故列于此

唐東封朝覲頌

右在元宗紀泰山銘右石崖上蘇頲所撰之文也明季
山東巡撫閩人林焯以忠孝廉節四大字鑱于其上毀
頌文十之三四觀者無不笑而罵之子同徐季重家敷
文坐崖石下俯仰太息謂古人刊碑勒碣蓋欲垂之不

朽而自秦以來邕分斯篆鑄磨倒壓廢爲他用者何可勝數惟此崖壁庶幾永存豈意千有餘年如焯者乎或曰焯欲題名岱巔何石不可乃加于燕許手筆之上橫招訕笑予曰不然使焯題名他石孰有過而視者今若此將與大許公並遠矣所謂不能流芳百世亦當遺臭萬年傳曰其愚不可及信然

唐李邕端州石室記

右記在今肇慶府城北七星巖下唐李邕撰張廷珪入分書開元十五年正月十五日建後有宋乾道己丑秋九月等字先文莊撫廣時搨歸原本也

唐道安禪師碑

右碑在嵩山廣平宋儋撰兼書開元十五年建道安爲宏忍大師之弟子忍受法于達摩所謂一花五葉之一也安以隋開皇四年生唐景龍二年卒百三十有四歲碑云是生如電隨風電盡卽風如我隨電亦空直瞿曇氏牙後慧耳書法道繁豐贍爲唐名家按儋字藏諸廣平人高尙不仕呂摠云儋書如暮春花發夏柳枝低葢倣鍾繇而側戾放縱者開元末舉場中多師之

唐少林寺碑

右碑題云皇唐嵩岳少林寺碑銀青光祿大夫守吏部尙書上柱國正平縣開國子裴濯文并書開元十六年建文極排偶之致洋洋纒纒二千餘言書亦整練不俗

亦唐碣之可觀者

唐忠武將軍李府君墓誌銘

右碑題云唐故忠武將軍行薛王府典軍上柱國平棘縣開國男李府君碑工部員外郎賈彥璿撰君諱無慮字思睿隴西人曾祖貴隋大中大夫咸州刺史涼國公皇降封隴西公祖斌父曰道皆以州刺史襲封隴西公則宗室也按宗室四十一房隴西渤海二房附見其譜定著二十九房所謂二房仍未見于世系表中惟渤海房始祖名恬而隴西房不著始祖名氏豈卽河東將軍仲翔葬隴西狄道因家而爲隴西之始祖如李府君者乃其系耶碑又云賢王端憂故人啜泣蓋宗支之未遠

者府君卒葬在開元中

唐敬節法師塏銘

右碑無書撰人姓名開元十七年七月建法師盧氏葺古刹造長廊于象教中能作有爲功德者寔于神和原亦陝碑之僅存而僻者也

唐三尊真容像記

右碑題云三尊真容像支提龕記又述義紉乾壽二師記陳留蔡景撰開元十九年九月建義紉至乾陀羅國迎得三藏鄔帝弟婆將真容畫像廿鋪舍利千餘粒三藏梵本二部往來四載途經一萬八千云唐時取經西域迎置大寺翻譯意卽元奘諸僧所撰不必盡出于西

域也

唐平蠻碑

右唐平南蠻碑開元十九年劍南節度副大使張敬忠立書撰人姓名殘泐碑云南蠻大酋長樂浪州刺史楊盛典顛爲邊患明皇遣內常侍高守信爲南道招慰處置使以討之拔其九城按此事新舊唐書及野史皆不載夫肅宗以魚朝恩爲觀軍容處使憲宗用突厥承瑾爲招討使議者譏其以中人主兵柄不知明皇先用守信蓋有以啟之也

唐馮處士墓誌銘

右碑題云唐故處士馮公墓誌銘并序無書撰人姓名

序云公諱懿字承美高祖子琮齊吏部尙書侍中尙書右僕射昌黎公會祖慈明齊內史以忠烈贈戶部尙書謚忠武祖怍父蹇皆唐刺史以景龍三年卒開元二十一年六月葬按傳子琮妻胡后妹也以戚屬輔道太子後出拜鄭州刺史復還鄴授吏部尙書而無侍中俄遷左僕射而非右未嘗封昌黎公似當以碑爲正子慈正而非慈明豈子琮有別子耶碑云慈明忠烈贈謚交至而不爲之立傳史之闕失多矣

唐鄭虔題名

右題名云開元二十三年四月二十三日滎澤鄭虔彪鄉道人智覺同登華山回步而謝于神云云其詞四六

排偶共百五十餘字史子華刻分書仿史惟則骨氣卑下非唐隸之佳者

唐北嶽神廟碑

右碑題云大唐北嶽神廟之碑陳州長史鄭子眷纂博陵崔鑲書凡神字作豐下從旦郊特牲曰所以交于旦明之義也鄭康成曰旦當爲神篆字之誤也莊子有旦宅而無情死亦讀爲神顧炎武曰昔之傳書者遺其上半因訛爲旦耳又曰畢卯乃是昴字省曰作單卯已異又加一點則爲胎卯之卯豈古人卯卯通用耶金史斜卯字本並作卯而潞州五龍祠明昌癸丑祈晴碑有上黨尉斜外温玉竟作夕傍從卩與此碑同

唐北嶽神廟碑陰

右碑陰紀段公德政崔鑲八分書段公著前碑字而不名此云諱愔字從簡也顧炎武金石文字記無年月可考者以此碑爲首予按碑陰後云我唐二年歲次乙亥閏十一月壬午朔廿二日癸卯建高宗上元二年乙亥無閏月志云開元二十三年閏十一月朔壬午食斗南十一度合朔與此碑同是年明皇欲相張守珪而張九齡曰宰相非賞功之官前碑極言守珪平定之功立碑應在此時決非上元可知所謂二年者爲唐歷第二次之乙亥也文人好作隱語故上無紀元或前碑已有開元年月而殘泐也顧氏考據最詳何未及此

光緒歲在丁亥仲春之月吳縣朱記榮槐廬家塾重刊
金石錄補卷十三

金石錄補卷十四

跋尾

槐廬叢書

崑山葉奕包九來著

吳縣朱記榮校訂

唐裴耀卿李林甫等奏

唐進法師塔銘

唐檀法師塔銘

唐無畏禪師塔銘

唐本願寺造準提像記

唐本願寺銅鐘銘碑陰

唐大房山碑

唐石臺道德經

唐周府君墓誌銘

金石錄補卷十四

朱氏槐廬校刊

唐山頂石浮屠後記

唐曹娥碑

唐開元寺陀羅尼經

唐張旭肚痛帖

唐張旭千字文殘碑

唐張旭書庾子山詩

唐褒封四子勅

唐元元靈應頌

唐薛君塏銘

唐隆闡法師碑

唐裴耀卿李林甫等奏

右奏後云開元廿三年二月十二日禮部尚書同中書門下三品上柱國臣李林甫中書令集賢院學士修國史上柱國曲江縣開國男臣張九齡侍中宏文館學士臣裴耀卿爲征契丹凱旋請宣付史館勒頌紀功未有臣耀卿等不勝區區之語按李傳帝欲廢太子九齡切諫林甫曰天子家事外人何與二十四年帝在東都欲還長安耀卿建言農人場圃未畢須冬盡可還林甫曰二都本東西宮車駕往幸何所待時則張裴與林甫如冰炭之不入獻媚頌功林甫所爲豈張裴與之並奏耶裴傳二十三年間已拜黃門侍郎同中書門下平章事並無侍中宏文館之銜且古來署名以前貫後安有林

甫居首而奏章末語反以耀卿爲辭竊疑此屬贗本但行楷精妙得大令神理自宋以後名流賞鑒授受有緒勒之貞珉已非一召存之以俟深考者

唐進法師塏銘

右進法師碑題云大唐大溫國寺故大德進法師塏銘并序太子司議郎陳光撰開漢寺沙門智詳敬寫開元廿五年七月八日建按法師姓高氏餘皆磨滅僅存形似銘七言四語殊矯拔唐時名寺住持僧無不立碑文與書不必皆出名手故可愛者絕少也

唐檀法師塏銘

右檀法師碑題云大唐京崇聖寺故翻譯大德檀法師

塏銘并序殿中侍御史姜立祐撰開元廿五年八月八日建後刊弟子十數人作八分書按法師字檀子姓朱氏聖歷元年召入洛陽宮補崇福寺大德改名塵外翻大寶積經一百廿卷著大無量壽經金剛般若經等疏維摩涅槃元章各一部撰經論總章三十餘道金剛經章門兩卷行於世行書筆圓而骨勁當亦其時之知名者

唐無畏禪師塏記

右塏記在咸陽原不空禪師墓前作于開元二十五年書法似顏平原敘述無畏過龍河一駝負經入龍宮講法留三宿又師子國象奔逸見無畏跪伏多與嚴郢所

金石錄卷十四
撰碑合又辨西域僧奏咒傳奕事曰此好事者爲之詞
若果爾則邪說不足以疵吾教也佛制戒律不踐生艸
况咒斷人命乎其文可觀錄之

唐本願寺造準提像記

右記鹿泉縣丞北平田垂棘造準提像一軀于銅鐘銘
之碑額又造二侍菩薩于像側而爲之記八分書係開
元廿六年建碑時造

唐本願寺銅鐘銘碑陰

右碑陰乃鹿泉縣本願寺都維那慧仙子開元十七年
同邑里清信士曾義纂等造鐘十九年二月八日鑄成
十月鐘樓亦就至廿六年建碑八分書凡諸信施皆正
書而曾義纂以俗士稱五戒何也鹿泉卽今之獲鹿縣

唐大房山碑

右大房山碑原無題額張湛詞序云開元廿七年己卯
三月府城西南有大房山孔水自廿三年內供奉呂愼
盈奉敕投龍璧廿四年又投璧至是而三矣按道家有
金龍玉簡學士院撰文具一歲齋醮投于名山洞府則
龍璧爲二物金石錄所載雲門山投龍詩北海太守于
天寶元默歲下元日投金龍環璧于此山是也元宗崇
信道家之說祭祀無秩碑云法師平步風張若水高味
虛童子延忠等三日三夜登壇投告僕恐陵谷推移封
山刊焉不僅糜資祈福爲無謂使封山出于臣下尤可

正 嗤也山在順天府良鄉縣唐志云大防山似當以碑爲

唐龍興觀石臺道德經

右道德經唐元宗注開元二十三年用道門威儀司馬
秀令天下應修官齋等州皆于大觀中立石臺刊勒邢
州龍興觀開元廿七年三月刺史李質立石摹勒如制
宋端拱初觀已廢沒知軍州何纘始修復之明嘉靖中
觀復廢僅存半畝之宮有尼居之太守徐衍祚改爲社
學而石臺隱于屋內人少知之者吾邑歸震川先生爲
邢州別駕見此經出之跋云千年之物莫知愛惜計亦
不能久矣

唐周府君墓誌銘

右碑云君諱貞字處廉汝南郡人也祖度父玩君廣談
八解之門高蹈四禪之域以開元廿八年正月廿日卒
二月九日窆于郊西北九里武邱東山則處廉當爲吳
郡人而云汝南者從周氏郡名之望也避諱故以虎爲
武祝京兆允明雜記云都元敬得此石于虎邱殿中之
佛後石可二尺許四周斲平如面題云唐故周府君墓
誌銘始知其姓石在南濠都氏

唐山頂石浮屠記

右記王守泰撰并行書開元二十八年四月建記云金
仙公主奏譯經四千餘卷并范陽縣東南五十里上城

村趙襄子淀中麥田莊并果園一所及環山林麓碑在房山縣

唐曹娥碑

右曹娥碑題後漢孝女曹娥之碑漢邯鄲淳誤唐刺史李邕書開元壬子季冬鐫勒附蔡邕題碑云黃絹幼婦外孫齏曰三百季後碑當墮不墮遇王叵另作隸書形方而樸如魏初諸碑體又一碑字絕大而結搆麤疎與此碑絕不類然崛強之致仍似北海本色或北海愛尙之文屢爲書之也故兩存之

唐開元寺尊勝陀羅尼經碑

右尊勝陀羅尼經碑在邢州開元寺西廡下吾邑歸震

川先生云其西面剝落書人姓名與立石之季月皆不可攷予按其序唐高宗永淳二年始自蔥嶺而來此經能滅衆惡業廣利羣生云云蓋寺建于開元當是開元時人書也

唐張旭肚痛帖

右張旭肚痛帖共二十九字極縱處却極緊嚴知草書之狂怪者非至也駱天驤長安志云碑在張金紫宅

唐張旭千字文殘碑

右張旭草書千字文復古碑錄云自學優登仕至卒章凡六百九十五字存者六百七十三複者五亡者二十二又從大觀別本得薄溫清而下四十六字乃併刻之

今已殘缺過半縱橫奇詭不可名狀東觀餘論評之詳矣

唐張旭書庾子山詩

右詩石刻在西安府學相傳爲謝靈運書心竊疑之以靈運不應見庾詩也嘉興曹侍郎溶云見真蹟于項氏是張旭書宜其奔放如駿馬下坂虬龍入雲固是書家神品

唐褒封四子勅

右碑褒封四子者莊子文子列子庚桑子也天寶元年二月日建按舊唐書禮儀志天寶元年正月癸丑陳王府參軍田同秀稱于京永昌街空中見元元皇帝以天

下太平聖壽無疆之言傳于元宗仍云桃林縣故關令尹喜宅旁有靈寶符發使求之十七日獻于含元殿二月丁亥御含元殿加尊號爲開元天寶聖文神武皇帝辛卯親祔元元廟丙申詔史記古今人表元元皇帝升入上聖莊子號南華真人文子號通元真人列子號冲虛真人庚桑子號洞虛真人改莊子爲南華真經文子爲通元真經列子爲冲虛真經庚桑子爲洞虛真經今人稱莊子書爲南華經本此新唐書禮樂志止載文宣王武成王釋奠之儀而不及元元升祔之詔見于元宗紀天寶二年正月作昇仙宮加元元皇帝曰大聖祖與舊書異不及封四子通鑑元年二月辛卯上享元元皇

帝于新廟與舊書同或以褒封四子非祀典之正故削而不錄微此碑幾以舊書爲可疑矣李肇國史補曰天寶中天下屢言聖祖見因以四子列學宮遂有僞爲庚桑子者其辭俚俗非古人書

唐元元靈應頌

右靈應頌碑倉部郎中戴璇撰序戶部郎中劉同昇撰頌開府儀同三司右僕射曾孫戴伋書天寶元季七月十五日建河南史榮刻分書絕類史惟則而去漢遠甚漢人無意而皆意不法而皆法也按宗聖龍卽尹喜宅元宗夢老子真容得于此玉真公主居之碑序頌皆鋪揚其事以欺後人也元宗侈談隱怪志業荒淫卒召安史之禍如戴伋者位居僕射不能格其非心又從而附和之宜正史之逸其名也與

唐薛良佐塏銘

右碑題云唐故翊麾副下關十騎都殿薛君塏銘右監餘字門衛長上上柱國良史書再從兄鈞撰序云龍集協洽月缺于臯朔已亥日辛酉君奄然卒于太平里之第春秋廿八惜也人到于今悲之草木衰日月逝覩天地之蕭瑟感幽冥之慘感欲見之不可得將捨之不可得爰起茲塏因誌于行是百二之論也君諱良佐字堯臣河東聞喜人文殊娟秀情亦婉轉塏建于終南山施陀林善知識之次實天寶二季閏二月也夫薛君身入仕林

金石錄卷一四
死依僧葬其舅季從之何也書有虞褚風味洵非俗筆

唐隆闡法師碑

右隆闡法師碑題云大唐實際寺故寺主懷惲奉敕贈隆闡大法師碑并序開元二年癸未十二月景寅朔景子建無書撰人姓名按碑云法師諱懷惲族姓張氏南陽人大足元季十月二十二日神遷春秋六十有二神龍元年敕贈隆闡大法師弟子大温國寺主思莊等敬想清徽勒茲元石云云則爲惲之徒所撰無疑王弇州竟以爲懷惲撰及書者謬也蓋以碑題下有懷惲及書四字耳郭允伯金石史云唐又有懷惲禪師姓謝謚大覺元和初憲宗召居上寺元和十二年十二月示滅建

塢灞水此云及書豈後懷惲追及書前懷惲碑而以爲幸耶此亦臆度之見也唐時寺主碑題必曰大德無直書其名者或此係奉敕故名之也行書秀潤圓潔得聖教遺意在半截碑之上

光緒歲在丁亥仲春之月吳縣朱記榮槐廬家塾重刊
金石錄補卷十四

